

無綫兩大咪神黃婧靈（波波）與郭珮文昨日出席活動，郭珮文密實打扮，被穿上性感拉丁舞衣的波波搶風頭。波波透露首次學拉丁舞已愛上，但她坦言因身材太勁「負荷」過度，試過一不留神就弄傷腰骨！

陳展鵬讚囡囡有運動天分

「負重」學拉丁舞

波波跳至腰痛



郭珮文（左）與邵初做啦啦隊。

陳展鵬否認老婆有喜。

陳展鵬、邵初、郭珮文、黃婧靈（波波）、《中年好声音》歌手周吉佩與羅啟豪等，昨日參與《全港運動全城躍動 第九屆全港運動會開幕禮》節目錄影。身為前港隊乒乓球代表的陳展鵬，笑言「搵車邊」參與節目，高興見近年港隊有好成績，現在他仍有保持打乒乓球習慣。

展鵬表示日前與任達華打乒乓球：「依家一星期打三四次，好高興乒乓球陪住我成長，依家年紀大，球技難免退步，但當做運動Keep住打。」問到女兒有沒有遺傳他的運動天分？展鵬說：「未知，因為佢未完成發育，不過我覺得佢有運動細胞，等佢再大啲，睇吓佢鍾意乜嘢運動，唔會強迫訓練佢打乒乓球。」提到有網民指單文柔長胖兼腹部微隆疑有喜，展鵬否認再做人父：「可能佢笑得太多令面部顯肥，我哋一直冇畀心機，如果有好消息一定話畀大家知。」問到太太會否介意被指肥？展鵬說：「佢同我都唔會因為幾句話就會影響到，而且我覺得佢一啲都唔肥，最重要健康同開心。」

身材驕人的波波穿低胸舞衣跳拉丁舞，相當搶鏡。她興奮表示首次學拉丁舞已上癮，打算

繼續學舞。記者指她非常性感，男舞伴會否尷尬？她說：「冇，大家都好專注聽音樂同數拍子，冇時間分心諗其他嘢。（你『負荷』咁重，跳到腰骨痛？）真係會喎，因為每個動作都拉得好直，唔小心就會Chok到。」

郭珮文認不適合做主持

邵初和郭珮文代表港姐做啦啦隊，見邵初雙腳滿布瘀痕，她說：「我好易瘀，可能近期做太多運動，喺屋企按摩嗰陣唔小心瘀咗。」郭珮文近日加入處境劇《愛·回家之開心速遞》，她解釋只是客串性質，希望正式加入劇組：「我有睇番自己演出，有少少尷尬，但總算過關，知道有好地方要改善。」至於在《福祿壽訓練學院》被取笑是「天然呆」，郭珮文直言做主持應付不來，相信王祖藍、李思捷下次不會再找她。提到其身材經常成為焦點，郭珮文坦言不介意被人評頭品足：「暫時除咗身材同天然呆，對觀眾嚟講我都有咩賣點。」



波波愛上拉丁舞，會繼續學習。

姜皓文撩女神傾偈

由姜皓文主演的《惡人當道》獲邀參展《第十四屆北京國際電影節》，於「光影浪潮·香港電影新動力」單元中舉行世界首映，他和導演連日來先後亮相開幕紅地毯及電影放映會等活動。姜皓文表示最開心是在紅地毯上遇見女神夏文汐，他上前跟女神閒談了幾句，發現對方很健談，希望日後有機會合作。他又稱現場觀眾很喜歡電影的劇照和海報，紛紛拿着給他簽名，他坦言很久沒跟觀眾近距離互動，希望電影在港上映時也可感受這種氣氛。



姜皓文讚夏文汐平易近人。

江美儀想做一曲歌后

向展鵬前晚在銅鑼灣舉行迷你音樂會，邀得向海嵐、安雅希、江美儀與梁思浩等演出。江美儀透露想當歌手，因為不少歌手憑一首歌已可走天涯，例如葉麗儀的《上海灘》至今仍膾炙人口，笑言要找韋綺珊練歌，希望有機會登台搵真銀：「亞視年代做夜場酒吧騷，一晚走幾場，想返番去嗰個搵錢年代，加入TVB後只試過因為《名媛望族》去過登台。（攞完視后想做歌后？）都係搵啖飯食，試試其他嘢，唱歌可以世界性、周圍去。」問到何時拍新劇？她笑言等待中：「似輪政府醫院，相信有等到嘅一日，只係時間長啲。」



江美儀很想登台搵真銀。

陳凱琳（Grace）和朱千雪（Tracy）昨日出席活動，宋熙年則擔任大會司儀。懷孕9個月的Tracy透露未知入院時間，月底仍要出席活動，但不覺辛苦：「我唔知嚟緊個肚會唔會再大好多，所以我依家都係行得就成，做得就做。」她笑言有向3子之母的Grace取經，亦收到對方送的嬰兒用品。而Grace叫Tracy現階段要好好休息，因為之後會愈來愈忙。

Tracy坦言可能不會舉辦Baby Shower公布BB性別：「因為我老公要飛，加上我做嘢做到月尾，所以睇吓5月有冇時間。」並笑言很享受身邊人猜測BB的性別。問到可會覺得自己是嚴母？Tracy說：「我唔知，因為我個人感覺上好Chill，但對某啲嘢又會好執着。」Grace則指性格會隨着小朋友成長而改變：「我成日俾囡囡蝦㗎！」



左起：宋熙年、朱千雪與陳凱琳合照留念。

朱千雪懷孕9個月 BB性別賣關子